

Na osnovu člana 12. Zakona o izmjenama i dopunama Zakona o lokalnoj samoupravi ("Službene novine Kantona Sarajevo", broj 14/00) i člana 37. stav 4. alineja 3. Poslovnika Skupštine Kantona Sarajevo - prečišćeni tekst ("Službene novine Kantona Sarajevo", broj 6/00), Zakonodavno-pravna komisija Skupštine Kantona Sarajevo, na sjednici od 24. oktobra 2000. godine, utvrdila je prečišćeni tekst Zakona o lokalnoj samoupravi.

Prečišćeni tekst Zakona o lokalnoj samoupravi obuhvata: Zakon o lokalnoj samoupravi ("Službene novine Kantona Sarajevo", broj 19/97) i Zakon o izmjenama i dopunama Zakona o lokalnoj samoupravi ("Službene novine Kantona Sarajevo", broj 14/00), u kojima je označen dan stupanja na snagu tih zakona.

## **ZAKON**

### **O LOKALNOJ SAMOUPRAVI (Prečišćeni tekst)**

#### **I - OSNOVNE ODREDBE**

##### Član 1.

Ovim zakonom uređuju se pitanja samoupravnog djelokruga općina i Grada Sarajeva (u daljem tekstu: Grad), kao jedinica lokalne samouprave na području Kantona Sarajevo (u daljem tekstu: Kanton), neposredno učestvovanje građana u odlučivanju, organi općine, odnosno Grada, mjesna samouprava, imovina i finansiranje lokalne samouprave, propisi i druga akta općine, nadzor i zaštita lokalne samouprave i druga pitanja od značaja za ostvarivanje lokalne samouprave.

##### Član 2.

U općini kao jedinici lokalne samouprave, koja se osniva, u pravilu, za područje više naseljenih mjesta koja predstavljaju prirodnu, ekonomsku i društvenu cjelinu i koja su povezana zajedničkim interesima stanovništva, građani ostvaruju lokalnu samoupravu u poslovima utvrđenim Ustavom, zakonom i statutom općine.

U Gradu, kao jedinici lokalne samouprave, koju čine općine Centar Sarajevo, Novi Grad Sarajevo, Novo Sarajevo i Stari Grad Sarajevo (u daljem tekstu: općine u sastavu Grada), građani ostvaruju lokalnu samoupravu u poslovima utvrđenim Ustavom, zakonom i Statutom Grada.

##### Član 3.

Područje općine i njen naziv i sjedište uređuju se posebnim zakonom, u skladu sa Odlukom o jedinstvenim kriterijima za konstituisanje novih općina ili izmjenu postojećih općina u Federaciji Bosne i Hercegovine ("Službeni list Federacije BiH", broj 4/95), s tim da promjene općinskih granica neće biti izvršene bez prethodne saglasnosti s općinskim vijećima kojih se to tiče.

##### Član 4.

Općina je pravno lice.

Općina ima Statut.

Statutom općine, u skladu sa Ustavom i zakonom, bliže se uređuju pitanja samoupravnog djelokruga općine, organizacija, ovlaštenja i način rada organa općine, oblici neposrednog odlučivanja građana o lokalnim poslovima, osnivanje i rad mjesnih zajednica, organizacija i rad lokalne uprave, oblici saradnje sa drugim općinama i druga pitanja od značaja za ostvarivanje lokalne samouprave.

## Član 5.

Općina može imati grb i zastavu.

Ministarstvo pravde i uprave Kantona daje saglasnost na sadržaj grba i zastave općine.

Grb mora biti opisan po pravilima heraldike i prikazan na posebnom dokumentu čiji se jedan primjerak čuva u arhivu Kantona.

Ministarstvo pravde i uprave Kantona uskratiti će saglasnost iz stava 2. ovog člana samo ako sadržaj grba ne odgovara istorijskom ili stvarnom stanju ili se nedovoljno razlikuje od grba druge općine, a zastavu samo iz razloga javnih obzira u vezi sa sadržajem i simbolom boja.

Općinsko vijeće u skladu sa propisima općine, može odobriti upotrebu grba fizičkim i pravnim licima, ako ocijeni da je to u interesu općine.

## Član 6.

Poslovi iz samoupravnog djelokruga općine i preneseni poslovi kantonalne uprave koji se obavljaju u općini, finansiraju se kroz općinski budžet i budžet Kantona, u skladu sa zakonom.

## Član 7.

Općine imaju pravo da u obavljanju svojih dužnosti međusobno sarađuju sa drugim općinama radi obavljanja poslova od zajedničkog interesa.

## II - SAMOUPRAVNI DJELOKRUG OPĆINE

### Član 8.

Općina je samostalna u odlučivanju u poslovima iz samoupravnog djelokruga, u skladu sa Ustavom i ovim zakonom, a podliježe nadzoru zakonitosti, koji obavljaju nadležni organi Kantona.

### Član 9.

Općina, u okviru samoupravnog djelokruga, u skladu sa zakonom kojim se uređuje pojedina oblast, obavlja naročito slijedeće poslove:

1. osigurava uslove za poštivanje i zaštitu ljudskih prava i osnovnih sloboda, u skladu s Ustavom;
2. osigurava lokalne potrebe stanovništva u oblasti brige o djeci, obrazovanju i odgoju, radu i zapošljavanju, socijalnoj zaštiti, kulturi, fizičkoj kulturi i sportu, zaštiti životinja i zaštiti bilja;
3. vodi urbanističko-stambenu politiku od značaja za općinu i njen razvoj;
4. upravlja općinskom imovinom;
5. obavlja komunalne i druge uslužne djelatnosti, te lokalne infrastrukture;
6. osigurava uslove rada lokalnih radio i TV stanica, u skladu sa zakonom;
7. vodi brigu o turističkim resursima općine;

8. osigurava korištenje i upravljanje lokalnim građevinskim zemljištem;

9. osigurava javni red i mir;

10. obavlja upravne poslove iz samoupravnog djelokruga općine.

Obavljanje pojedinih poslova iz samoupravnog djelokruga može se, u skladu sa zakonom povjeriti ustanovama, privrednim društvima, preduzećima, drugim pravnim licima i samostalnim privrednicima osnovanim radi obavljanja javnih službi u općini.

#### Član 10.

Grad u okviru samoupravnog djelokruga, obavlja poslove utvrđene Statutom Grada i zakonom.

Odlukom Gradskog vijeća, odnosno Općinskog vijeća općina koje čine Grad, mogu se međusobno prenositi pojedini poslovi iz njihovog samoupravnog djelokruga.

Općine u sastavu Grada, u okviru samoupravnog djelokruga, obavljaju poslove iz člana 9. ovog zakona, izuzev poslova iz stava 1. ovog člana.

Obavljanje pojedinih poslova iz samoupravnog djelokruga Grada može se, u skladu sa zakonom, povjeriti ustanovama, privrednim društvima, preduzećima, drugim pravnim licima i samostalnim privrednicima.

#### Član 11.

Poslovi uprave iz samoupravnog djelokruga općine i grada i poslovi kantonalne uprave koji se obavljaju u općini i Gradu određuju se zakonom.

Troškovi obavljanja poslova kantonalne uprave koji su preneseni na općinu odnosno Grad, podmiruju se iz budžeta Kantona.

U obavljanju poslova iz stava 1. ovog člana, općinski načelnik odnosno gradonačelnik, izvršava prava i obaveze u skladu sa zakonom kojim se uređuje kantonalna uprava.

### III - NEPOSREDNO UČESTVOVANJE GRAĐANA U ODLUČIVANJU

#### Član 12.

Građani mogu neposredno da učestvuju u odlučivanju o lokalnim poslovima iz samoupravnog djelokruga općine, refe-rendumom, mjesnim zborom građana i građanskom inicijativom, u skladu sa zakonom i statutom općine.

#### Član 13.

Referendum se može raspisati radi odlučivanja o prijedlogu o promjeni statuta općine, o prijedlogu propisa ili drugog općeg akta, kao i o drugim pitanjima iz djelokruga Općinskog vijeća određenim zakonom i statutom općine.

Referendum, na osnovu zakona i statuta općine, raspisuje Općinsko vijeće, na prijedlog jedne trećine članova Općinskog vijeća, na prijedlog općinskog načelnika ili na prijedlog jedne petine mjesnih zajednica na području općine.

#### Član 14.

Pravo odlučivanja na referendumu imaju građani koji imaju prebivalište na području općine i upisani su u birački spisak.

Odluka donesena na referendumu obavezna je za Općinsko vijeće i građane.

Postupak održavanja referenduma propisuje se statutom općine u skladu sa zakonom.

Na odluke donesene referendumom primjenjuju se odredbe ovog zakona o nadzoru i zaštiti lokalne samouprave.

#### Član 15.

Na mjesnom zboru građani mogu raspravljati o svim pitanjima iz samoupravnog djelokruga općine, predlagati način rješavanja određenog pitanja, odnosno donošenja akata iz djelokruga Općinskog vijeća.

Općinsko vijeće može tražiti mišljenje od zbora građana mjesne zajednice o prijedlogu općeg akta ili drugog pitanja iz djelokruga općine, kao i o drugim pitanjima određenim zakonom i statutom općine.

#### Član 16.

O svakom pitanju iz djelokruga Općinskog vijeća može se pokrenuti rasprava putem građanske inicijative.

O prijedlogu iz prethodnog stava Općinsko vijeće mora raspravljati ako ga potpisom podrži najmanje deset posto birača upisanih u birački spisak općine i dati odgovor podnosiocima najkasnije u roku od tri mjeseca od prijema građanske inicijative.

Pismena odluka se dostavlja nosiocu građanske inicijative odmah po njenom donošenju.

#### Član 17.

Općinski načelnik dužan je omogućiti građanima i pravnim licima podnošenje prigovora i pritužbi na svoj rad i rad službi za upravu općine, kao i na nepravilan odnos zaposlenih kad im se obraćaju radi ostvarivanja svojih prava i interesa ili izvršavanja svojih građanskih dužnosti.

### IV - ORGANI OPĆINE

#### 1. Zajedničke odredbe

#### Član 18.

Općinsko vijeće i općinski načelnik su organi vlasti u općini koji svoju funkciju vrše u skladu s Ustavom, zakonom i statutom općine.

#### Član 19.

Općinsko vijeće je predstavničko tijelo građana i općine.

Općinski načelnik je izvršno-upravni organ općine.

#### Član 20.

Broj općinskih vijećnika utvrđuje se statutom općine, u skladu s Ustavom Kantona, zavisno od broja stanovnika općine.

#### Član 21.

Izbor općinskih vijećnika vrši se u skladu sa Ustavom, zakonom i statutom općine, na slobodnim demokratskim izborima.

Trajanje mandata općinskih vijećnika utvrđuje se Ustavom i zakonom.

Prava i dužnosti općinskih vijećnika utvrđuju se zakonom i statutom općine.

#### Član 22.

Općinsko vijeće donosi propise i akte u okviru prava i dužnosti općine i obavlja i druge poslove u skladu sa zakonom i statutom općine.

#### Član 23.

Unutrašnja organizacija i način rada Općinskog vijeća uređuju se poslovníkom, u skladu s ovim zakonom i statutom općine.

Poslovník se donosi većinom glasova izabranih općinskih vijećnika.

#### Član 24.

Općinsko vijeće bira, između izabranih općinskih vijećnika, predsjedavajućeg i zamjenika predsjedavajućeg.

Predsjedavajući zastupa Općinsko vijeće i predsjedava sjednicama Općinskog vijeća.

Predsjedavajući i zamjenik predsjedavajućeg Općinskog vijeća svoju dužnost mogu obavljati profesionalno, što se bliže uređuje statutom i poslovníkom o radu Općinskog vijeća.

Općinsko vijeće bira, na prijedlog izabranih općinskih vijećnika, sekretara Općinskog vijeća, koji tu dužnost obavlja profesionalno.

#### Član 25.

Općinsko vijeće donosi odluke većinom glasova izabranih općinskih vijećnika.

Statut, budžet i završni račun budžeta se donose dvotrećinskom većinom glasova izabranih općinskih vijećnika.

Statutom općine odredit će se način odlučivanja Općinskog vijeća o drugim pitanjima, ukoliko to ovim zakonom nije određeno.

Poslovníkom Općinskog vijeća mogu se odrediti i druga pitanja o kojima se odlučuje većinom glasova izabranih općinskih vijećnika.

## Član 26.

Općinsko vijeće može osnivati savjete, komisije, odbore i druga radna tijela u svrhu priprema odluka iz njegovog djelokruga.

Sastav, broj članova, djelokrug i način rada tijela iz prethodnog stava utvrđuju se poslovnikom, odnosno posebnom odlukom, o osnivanju radnog tijela.

## Član 27.

Općinski vijećnik, u skladu sa odlukom Općinskog vijeća, ima pravo na naknadu za rad u Općinskom vijeću i pravo na naknadu troškova odnosno izgubljenju zarade i odgovarajuće socijalno osiguranje (zdravstveno i penziono), ukoliko to pravo ne ostvaruje po drugom osnovu.

Nespojive su funkcije općinskog načelnika, odnosno općinskog službenika i namještenika s funkcijom općinskog vijećnika.

## Član 28.

Općinskog načelnika bira Općinsko vijeće većinom glasova izabranih općinskih vijećnika, na način i po postupku utvrđenom poslovnikom vijeća, u skladu sa statutom općine.

Općinski načelnik biće smijenjen ako se za njegovu smjenu izjasni dvotrećinska većina izabranih općinskih vijećnika.

### 2. Općinsko vijeće

## Član 29.

Općinsko vijeće:

1. donosi Statut općine,
2. donosi odluke, druge propise i opće akte i daje njihovo tumačenje,
3. donosi poslovnik o svom radu,
4. obrazuje radna tijela i utvrđuje njihove nadležnosti, sastav, broj članova i način rada (savjete, komisije, odbore i dr.), radi stručne obrade i praćenja određenih oblasti u okviru određene nadležnosti Općinskog vijeća, predlaganja stručnog rješenja u tim oblastima i, izuzetno radi odlučivanja o pitanjima koja su im izričito data u nadležnost,
5. bira i smijenjuje predsjedavajućeg vijeća i njegovog zamjenika, sekretara, općinskog načelnika i članove radnih tijela Općinskog vijeća,
6. donosi budžet i izvještaj o izvršenju budžeta i usvaja završni račun na prijedlog općinskog načelnika,
7. donosi program razvoja za pojedine djelatnosti za koje je nadležno,
8. donosi propise o općinskim pristojbama i na drugi način osigurava potrebna finansijska sredstva, u skladu sa zakonom,

9. osniva javna preduzeća i javne ustanove i druga pravna lica za obavljanje privrednih, društvenih, komunalnih i drugih djelatnosti od interesa za općinu,

10. raspisuje referendum,

11. raspisuje javni zajam i samodoprinos i odlučuje o zaduženju općine,

12. donosi propise o organizaciji i osniva organ uprave,

13. utvrđuje naziv za dijelove naseljenog mjesta,

14. podnosi inicijativu za davanje i izmjenu naziva ulica, trgova, mostova i dr.

15. obrazuje organ koji u drugom stepenu rješava po žalbi protiv prvostepenih rješenja općinskog načelnika, donesenih na osnovu statuta ili propisa Općinskog vijeća,

16. vrši i druge poslove utvrđene zakonom i statutom općine.

3. Općinski načelnik

#### Član 30.

Općinski načelnik odgovoran je Općinskom vijeću za obavljanje poslova iz nadležnosti iz samoupravnog djelokruga općine.

Općinski načelnik, u obavljanju poslova iz samoupravnog djelokruga općine, nadležan je za:

1. sprovođenje općinske politike, izvršavanje općinskih propisa i općih akata i izvršavanje prenesenih nadležnosti općini od strane Kantona,

2. imenovanje i smijenjivanje svih općinskih službenika i namještenika,

3. osigurava saradnju općinskih službenika sa ombudsme- nima,

4. podnosi prijedlog izvještaja Općinskom vijeću i javnosti o provođenju općinske politike i svojih aktivnosti,

5. obavještava Skupštinu Kantona, odnosno kantonalne organe o izvršavanju kantonalne politike i kantonalnih zakona i drugih propisa i međunarodnih ugovora, kao i o stanju u odgovarajućoj oblasti, kad je izvršavanje te politike i tih zakona, odnosno međunarodnih ugovora povjereno općini.

U obavljanju prenesenih poslova kantonalne uprave, općinski načelnik vrši poslove utvrđene zakonom kojim se uređuje kantonalna uprava.

#### Član 31.

Za obavljanje poslova iz svoje nadležnosti, poslova lokalne samouprave i upravnih poslova iz samoupravnog djelokruga općine, kao i prenesenih poslova kantonalne uprave, općinski načelnik organizuje općinske službe za upravu.

Općinski načelnik sa službama za upravu obavlja poslove uprave iz samoupravnog djelokruga općine i poslove kantonalne uprave koji su kantonalnim zakonom preneseni na općinu, u okviru jedinstvenog općinskog organa uprave.

Odluku o obrazovanju jedinstvenog općinskog organa uprave donosi Općinsko vijeće na prijedlog općinskog načelnika.

#### Član 32.

Zakonom kojim se prenose poslovi kantonalne uprave, bliže se uređuju prava i dužnosti organa uprave općine u obavljanju prenesenih poslova, kao i način vraćanja Kantonu prenesenih poslova kantonalne uprave.

Općinski načelnik obavezan je organizovati službe za upravu za obavljanje prenesenih poslova kantonalne uprave u skladu sa zakonom kojim se uređuje kantonalna uprava.

#### Član 33.

Ukoliko mjesto općinskog načelnika ostane upražnjeno, Općinsko vijeće izabrat će novog općinskog načelnika u roku od 30 dana.

U slučaju da općinski načelnik privremeno nije u mogućnosti da obavlja svoju dužnost, funkciju općinskog načelnika vrši lice određeno statutom općine.

#### 4. Savjet općinskog načelnika

#### Član 34.

Radi izvršavanja poslova iz nadležnosti općinskog načelnika, može se osnovati Savjet općinskog načelnika.

Savjet općinskog načelnika pomaže općinskom načelniku u donošenju, pripremanju i izvršavanju odluka i drugih akata iz njegove nadležnosti i vrši i druge poslove utvrđene statutom i drugim propisima općine.

#### Član 35.

Sastav i broj članova Savjeta općinskog načelnika utvrđuju se odlukom općinskog načelnika o osnivanju Savjeta općinskog načelnika.

#### V - MJESNA ZAJEDNICA

#### Član 36.

Mjesna zajednica se osniva kao oblik neposrednog učestvovanja građana u odlučivanju o lokalnim poslovima.

Mjesna zajednica osniva se za jedno naseljeno mjesto, više međusobno povezanih manjih naselja ili za veći dio većeg naselja koji u odnosu na ostale dijelove čini zasebnu razgraničenu cjelinu.

#### Član 37.

Mjesnu zajednicu osniva Općinsko vijeće.

Inicijativu za osnivanje mjesne zajednice mogu dati građani i njihove organizacije i udruženja, te druga tijela određena u statutu općine.



#### Član 38.

Statutom općine, u skladu sa zakonom, uređuje se postupak osnivanja, djelokrug, organi i ovlašćenja organa mjesne zajednice, način izbora i opoziva organa mjesne zajednice, utvrđivanje programa rada mjesne zajednice, osnove pravila mjesne zajednice, način finansiranja djelatnosti mjesne zajednice, obavljanje administrativnih i drugih poslova za potrebe mjesne zajednice, kao i druga pitanja od značaja za ostvarivanje prava i obaveza mjesne zajednice utvrđenih zakonom, statutom općine i drugim općim aktom Općinskog vijeća.

Organi mjesne zajednice su: zbor građana, savjet i drugi organi utvrđeni statutom općine.

#### Član 39.

Statutom ili odlukom općine može se mjesnoj zajednici povjeriti obavljanje pojedinih poslova iz samoupravnog djelokruga općine, koji su od neposrednog i svakodnevnog uticaja na život i rad građana na području mjesne zajednice.

Sredstva za obavljanje poslova iz prethodnog stava obezbjeđuju se u budžetu općine.

#### Član 40.

Sredstva za zadovoljavanje potreba i interesa građana u mjesnoj zajednici obrazuju se od:

1. sredstava građana koja oni udružuju putem samodoprinosu ili na drugi način,
2. naknada za usluge i drugih prihoda koji svojim aktivnostima ostvaruje mjesna zajednica,
3. prihoda koje općina ustupa mjesnoj zajednici, u skladu sa planovima razvoja mjesne zajednice odnosno općine,
4. poklona i drugih sredstava.

#### Član 41.

Mjesna zajednica ima svojstvo pravnog lica u pogledu prava i obaveza utvrđenih statutom općine i zakonom.

### VI - FINANSIRANJE I IMOVINA OPĆINE

#### Član 42.

Općini pripadaju prihodi za obavljanje njenih dužnosti i ovlaštenja u skladu sa zakonom i propisom Kantona.

Općini pripadaju javni prihodi u skladu sa propisom Kantona.

Prihodi općine su naročito:

prihod od nepokretnih i pokretnih stvari u vlasništvu općine,

prihodi od preduzeća i drugih pravnih lica u vlasništvu općine, kao i prihodi od koncesija koje odobrava općina,

prihodi od prodaje pokretnih i nepokretnih stvari u vlasništvu općine,

pokloni, nasljedstva i legati,

općinski porezi i takse čije stope, u granicama određenim zakonom, utvrđuju samostalno,

pomoć i dotacije,

naknada troškova iz budžeta Kantona za obavljanje poslova kantonalne uprave koji su preneseni na općinu,

drugi prihodi utvrđeni zakonom.

Radi zadovoljavanja potreba građana, sredstva se mogu prikupljati na osnovu neposrednog izjašnjavanja građana, u skladu sa zakonom, odnosno statutom.

#### Član 43.

Općina ima budžet u kome se iskazuju prihodi i rashodi.

Budžet se izrađuje na način predviđen zakonom i donosi se za jednu kalendarsku godinu.

Po isteku godine za koju je budžet donesen sastavlja se završni račun i izvještaj o izvršenju budžeta.

Ukoliko se godišnji budžet za narednu godinu ne može donijeti prije početka godine za koju se donosi, vodi se privremeno finansiranje i to najduže za period od tri mjeseca.

Odluku o privremenom finansiranju donosi Općinsko vijeće u skladu sa zakonom.

#### Član 44.

Općina samostalno raspolaže prihodima koji joj pripadaju i može se zaduživati i zaključivati ugovore o kreditu o čemu odlučuje Općinsko vijeće.

#### Član 45.

Općina ima u vlasništvu nekretnine i pokretnine.

Imovinom u vlasništvu općine mora se upravljati brižno, u skladu sa zakonima i drugim propisima.

### VII - PROPISI I DRUGI AKTI OPĆINE

#### Član 46.

Općinsko vijeće donosi statut, općinske propise (u daljem tekstu: odluka), budžet, završni račun i izvještaj o izvršavanju budžeta, poslovnik Općinskog vijeća, i zaključke, daje autentična tumačenja propisa koje donosi i utvrđuje njihov prečišćeni tekst.

Poslovníkom Općinskog vijeća bliže se utvrđuje sadržaj i način pripremanja i donošenja općinskih propisa i drugih akata općine i način njihovog objavljivanja.

Propisi i opći akti organa općine moraju biti u saglasnosti sa Ustavom i zakonom.

#### Član 47.

Općinski načelnik osigurava izvršavanje propisa i općih akata iz prethodnog člana na način i u postupku propisanom zakonom i statutom općine i obavlja nadzor nad zakonitošću rada općinskih službi za upravu.

#### Član 48.

Načelnik općine, u izvršavanju propisa i općih akata iz samoupravnog djelokruga općine, donosi opće akte (uredbe, naredbe, pravilnike i uputstva) i pojedinačne akte kojima se rješava o pravima, obavezama i pravnim interesima fizičkih i pravnih lica u prvom stepenu.

Protiv upravnih akata općinskog načelnika, donesenih u prvom stepenu, na osnovu statuta ili propisa Općinskog vijeća, u drugom stepenu rješava nadležni organ kojeg obrazuje Općinsko vijeće.

#### Član 49.

Općinski načelnik, u prenesenim poslovima kantonalne uprave, rješava u upravnim stvarima u prvom stepenu.

Protiv upravnih akata općinskog načelnika iz prethodnog stava, u drugom stepenu rješava nadležno kantonalno ministarstvo.

### VIII - NADZOR I ZAŠTITA LOKALNE SAMOUPRAVE

#### Član 50.

Kanton svojim nadzorom podržava lokalnu samoupravu na području općine i brine se za poštivanje ustavnosti i zakonitosti.

Nadzor nad radom organa općine obavlja se na način i po postupku predviđenom Ustavom i zakonom.

Nadzor iz prethodnog stava provodi se shodno načinu i postupku utvrđenom zakonom kojim se uređuje kantonalna uprava.

Nadzor nad radom organa općine obavlja se na način koji osigurava da intervencija nadzoronog organa bude u granicama kojima se štite prava i dužnosti općine utvrđene ovim zakonom.

#### Član 51.

Predsjednik Kantona, ako ocijeni da prijedlog, odnosno usvojeni statut općine, odnosno opći akt kojeg donosi Općinsko vijeće u suprotnosti s Ustavom, odnosno kantonalnim zakonom i drugim kantonalnim propisima, upozorit će na to Općinsko vijeće.

Ukoliko Općinsko vijeće ne postupi u skladu sa upozorenjem i usvoji, odnosno ne uskladi već usvojeni akt iz stava 1. ovog člana, predsjednik Kantona će podnijeti zahtjev Ustavnom sudu Federacije Bosne i Hercegovine, u skladu sa ovlaštenjima utvrđenim Ustavom.

#### Član 52.

Radi ostvarivanja Ustavom, zakonom i statutom utvrđenih prava, obezbjeđuje se zaštita prava građana na lokalnu samoupravu.

#### Član 53.

Zaštita prava građana na lokalnu samoupravu obuhvata naročito:

1. prava građana da putem referendumu i drugih oblika odlučivanja ličnim izjašnjavanjem i preko slobodno izabranih predstavnika odlučuje u poslovima lokalnog značaja,
2. prava građana na samoorganizovanje,
3. prava građana da budu konsultovani o svim pitanjima kada se zakonom uređuju pitanja kojima se regulišu prava i obaveze općine,
4. prava građana da na zborovima građana razmatraju i daju mišljenja u slučajevima kada Kanton želi prenijeti pojedine poslove općini iz okvira svoje nadležnosti.

#### X - PRIMJENJIVANJE ODREDBA OVOG ZAKONA

#### Član 54.

Odredbe ovog zakona shodno se primjenjuju na Grad, kao jedinicu lokalne samouprave i njegove organe i službe, ako Ustavom Kantona, zakonom i Statutom Grada nije drugačije određeno.

#### X - PRELAZNE I ZAVRŠNE ODREDBE

#### Član 55.

Do dana prvog zasjedanja Općinskog vijeća, nastavljaju s radom dosadašnja prelazna Općinska vijeća, u okviru svojih dosadašnjih prava i obaveza.

#### Član 56.

Statuti općina i propisi o organizaciji uprave u općini donijeće se u skladu s odredbama ovog zakona, u roku od tri mjeseca od dana stupanja na snagu ovog zakona, do kada nastavljaju s radom dosadašnji općinski organi uprave i službe.

#### Član 57.

Stupanjem na snagu Zakona o lokalnoj samoupravi ("Službene novine Kantona Sarajevo", broj 19/97), na području Kantona neće se primjenjivati odredbe Zakona o načelima postupka obrazovanja mjesnih zajednica ("Službeni list SR BiH", br. 22/81 i 8/91).

Broj 01-05-315/00 24. oktobra 2000. godine Sarajevo

Predsjednik Zakonodavno-pravne komisije Avdo Čampara, s. r.